

qarsaatigigitsik suleqataarusuttut Nuummi pikkorissarniarlugit. Taamatut pikkorissaanermi inuit sakkussaani atorfissaqartitaannillu allanik tuniorarneqarsinnaapput.

Maannamullu angalanerit taakkuinnaagaluartut iluatilluartutut misigisimagamikkitt sinnerinutaaq isumaluarnarput.

Taavami maanna susoqassava?

- Massakkut taava Tunumut, siullermik Ittoqqortoormiunut ataatsimiititsiartussaagut eqimattanillu suleqataarusuttunik aamma aallartitsiniassalluta. Ataatsimiititsinerit saniatigut inuit apersortarpagut najukkaminni utoqqaanertik qanoq misigisimaneeraat, soorlu assersuutigalugu kiserliornersut allatigulluunniit pisariaqartitsinersut, kiisalu suliniut una qanoq isumaqarfigineeraat. Soorlu assersuutigalugu imminut ikiorsinnaajunnaarunik utoqqaqatiminnik taamatut pulaartoqartarnissartik qanoq igissaneraat.

Ataatsimoorneq pilerseqqikkusuppaat

Allaaserisami allami eqqaaneqartutut suliniummi Utoqqat utoqqarnumi nunatta avataatigut peqataapput Skotland, Irland, Finland Sverigelu peqataapput. Taak-

kuli allat suli pulaartartunik aallartitsisimangillat, kajumissaaraluni oqaloqatiginninnerit ingerlateqqaaruskamikkitt. Nunatsinnili angalanerit akisoqimmat ingerlaannaq aallartisaanissaq pisariaqarsimavoq. Rosemarie Elsner nangippoq:

Taamatut ataatsimoornerulernissamut piffissanngorami, inuit ullumikkut avissaaqqavallaagimik. Utoqqaannaangitsut allattaq tamanna misigisorujussuaat, tassa susassareqatigiinngippallaartugut. Taamaattumik suliniutit ataatsimoorfusinnaasut pingaarteqaaqat iluatinnarlutillu.

Aamma Arsummi Paamiunilu ataatsimiititsinitsinni eqqartorneqartunut ilaavoq inuit nikanarsaasut imaluunniit nakkarsaasut aqutsivallaartartut. Taamaalisoqaraangat sulerusukkaluit nipangiinnartarput, immaqalu ornigutissaarlutik ataatsimiinnernut. Tassalu isumaqatigiissutaavoq inuit ajortussarsiortut nipangersarneqartariaqartut, oqarluni taama pissusilersorneq akuerinngilarput, nuannersut akunnitsinni iluaqutaasut sammerusukkatsigit. Tassami nuannaarnartunik pineqaraangatta nukissanik tunineqartarpugut, Rosemarie Elsner naggasiivoq.

